

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndindúú rí jíin hermano yō Timoteo cátee ri carta yáha cuájeē nuū rohó hermano ñuu Corinto jeē cá candíje ró Yaā Dios, jíin núū ndíhi rohó jéē cáyihí ndaha Yaā Dios jeē cáyūcu níí cáhnu Acaya. ² Te cáñuhun ni rí jeē Tatá yō Yaā Dios jíin Jítoho yō Jesucristo na sáha ga yā jeē váha róhó te sáha ya jeē coo ndeyí coo sñi ni rō.

Siquí jeē ní ndoho Pablo jnūndóho

³ Na cáhán yō jeē yóhyo cújéhnu Yaā Dios, Yaā cúu Tatá maá Jítoho yō Jesucristo. Chi máá yá cúu Tatá yō jeē cundáhú ni yohó, te níí sáha ya jeē ndúsñi ni yō. ⁴ Chi sáha ya jeē ndúsñi ni yō siquí táca jnúndóho ndóho yó, návāha suni cuu sáha máá yó jeē ndúsñi ni jnáhan yó jéē cándoho jnūndóho. Chi nájnūhun ni sáha ya jeē ndúsñi ni maá yó, suni súcuan sáha yó jéē ndúsñi ni i. ⁵ Chi jeē ndóho yó cuehē jnūndóho nájnūhun ni ndoho Cristo, suni súcuan nihín yō cuehē jnūhun ndusñi ni, sáha Cristo. ⁶ Jeē yúcuan núu cándoho ri jnūndóho te súcuan te cuu sáha ri jeē ndúsñi ni rō te quendō vāha ga anuá rō. Te jeē sáha Yaā Dios jeē ndúsñi ni rí, suu sáha tucu jeē ndúsñi ni maá ró, te quéndō vāha ga anuá rō. Te súcuan te nihín rō fuerza jeē cuándeýí ni rō jíin táca jnúndóho nájnūhun cándoho ri. ⁷ Te cáñuhun ndasí ni rí jeē cúu róhó, chi cájini rí jeē nájnūhun cándoho ró jnúndóho jíin rí, suni súcuan ndusñi ni rō jíin rí sáha máá Yaā Dios.

⁸ Hermano, cǎcuni rī jeē na cúni rō jijnáhan ró ndese ni candoho ri ichi Asia. Chi yōhyo xeēn jnūndóho ni cajito ri, nde je yajni tuá canda ri, te ni jeni ni rī jeē cuu rī nuú. ⁹ Te síquī jeē ní cajehnde ni rī cuu rī, te yūcuan ní sáha jeē ní cajecūhun ni rī jeē ma ténuū rī maá rí chi tú jniñu ri, chi sa suhva Yaā Dios jeē nastécu ndīyi tenuū rī. ¹⁰ Chi máá yá ni scácu ruhū jijnáhan ri nuū jnūndóho xeēn jeē jé yajni cuu rī nuú, te suni súcuan scácu ya ruhū vijna. Te ñúhun ni rī jeē suni scácu tucu ya ruhū ichi núú gā. ¹¹ Te suni na chindéé ñáhán ró rúhū jijnáhan ri jeē cacān tahu rō jehē rī. Chi núu cuehē ñayuu cacān tahu jehē rī, te suni cuehē i cuu nacuatáhu jehē rī jeē ni sáha ya jeē váha ruhū.

Jeē ní cucuéé Pablo quihīn de ñuu Corinto

¹² Iyó ñn jeē sáha jeē cǎcusī ni rī: Chi vāha íyó ni anuá rī jeē váha ndoo te ndaā ni cajica ri nuū ñáyuu ñayīví, te víhya gā nuū maá ró jijnáhan ró. Chi síquī jeē váha ni Yaā Dios, te ni chindéé ñáhán yá ruhū, te nasūu síquī jéé ndichí máá rí cúu jeē ní cajica ri súcuan. ¹³ Te jnūhun cátee ri nuū tāca carta rī, chi máni jeē cúu cahu ró te jecūhun ni rō cúu. Te ñúhun ni rī jeē jecūhun vāha ga ni rō, ¹⁴ nájñūhun je cájecūhun ni rō jecu. Te súcuan te cuu cusī ni rō síquī rī quivī ndīji Jitoho yō Jesús, nájñūhun cǎcusī ni rī síquī maá ró.

¹⁵ Te síquī jeē súcuan ni cucáhnu ni rī, te jeē yūcuan ní jeni ni rī jeē núu na quihín rī Macedonia te jeē rī nuū maá ró xihna gā, návāha cusī ni rō jeē jécondēhe rí rohó úū jínu núú. ¹⁶ Chi ni jeni ni rī jeē jécondēhe rí rohó, te yāha ri quihín rī Macedonia, te jeē nándicó rí Macedonia te ndiji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea nuú. ¹⁷ Te jeē súcuan ni jeni ni rī, ¿te á tée tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájñūhun

ñayuu ñayīvi jéē yachī cahán jeē cuu, yūcuán na te tuú, chí naún? ¹⁸ Tuú chi máá Yaā Dios jíni yā jeē tu cáhán rī jíin ró jeē cuu, te yachī nácahān rī jeē ma cúu. ¹⁹ Chi ruhū jíin Silvano jíin Timoteo ni canacani ri jnūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cahán yā. ²⁰ Chi ndīhi jeē ni jéjnūhun Yaā Dios, squícu máá Cristo. Te jeē yúcuán cácahān yō jeē yóhyo luu cújéhnu Yaā Dios, te cácahān yō Amén, chi ndīhi squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jíin róhó jíjnáhan ró, cáhiin nīhin yó jíin Cristo, te ni sándoo ya yohó jéē cuajníñu yó núu yā. ²² Te suni ni jēhe ya Espíritu yā jeē cóndee ini anuá yō, te cúu ya nájnūhun ñin sello jeē steén jeē cúu yó séhe Yaā Dios. Te sáha Espíritu jeē iyó ndāā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúni rī cuxeēn rī nuū rō jeē tu cásáha váha ró. Te máá Yaā Dios cúu Yaā jíni jeē cahán ndāā rī. Te íyó váha jeē na cúu rī te núu tu cáhán ndāā rī. ²⁴ Te nasūu jéē cácuini rī ndacu nīhin ri jniñu nuū rō siquī jnúhun cácañdije ró yá, chi je cáhiin nīhin ro jíin jnúhun ún. Chi sa suhva cácuini rī chindéé ñáhán rí rohó jéē na cúsih gā ni rō.

2

¹ Núu súcuán te ni jeni ni rī jeē ma jéé rī inga jínu nuū rō jíin jnúhun cuxeēn rī te cucuíhyá ni rō sáha ri. ² Chi núu cucuíhyá ni rō sáha ri, ¿te ndé ñáyuu sáha jeē cusih ni maá rí? Tuá na inga ñayuu, chi máni máá róhó, te ndese cuu te núu ni sáha ri jeē cucuíhyá ni rō. ³ Te jeē yúcuán cúu jeē ní tee ri carta un núu rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quívi jeé rī nuū rō. Chi sa suhva sáha ró jéé cúsih ni rī. Te jíni

vāha ri jeē núu cusīh ni rī, te suni ndīhi ró jíjnáhan ró cusīh ni rō. ⁴ Te jeē ní tee ri carta un núū rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téé ri jeē sáha ri jeē cucuíhyá ni rō, chi sa suhva návāha cuni rō ndese yōhyo manī rī jíin ró.

Jeē íne cáhnu ni Pablo nuū téé ni sáha cuēchi

⁵ Te jeē ní cucuíhyá ni rī ni sáha tēe jeē ni sáha cuēchi ún, te nasūu máá-ni ri, chi suni nde máá ró jíjnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúni rī cuxeēn ndasí rí. ⁶ Te jíin jēé ní cacuxeēn rō nuū de ná ni candutútú ró, te jíin yúcuan-ni te ni cuu-ni. ⁷ Te vijna chi jíni ñúhún jeē cóne cáhnu ni rō nuū de, te sáha ró jēé ndúsīh ni de, chi sanaa te caa ga cucuíhyá ni de, te ma ndúsīh gā ni de. ⁸ Núu súcuan te cáhán ndahú rí jíin ró jíjnáhan ró jēé steén tucu ró jēé iyó manī rō jíin de. ⁹ Chi jeē siquí jniñu yáha cúu jeē ní tee ri carta un núū rō, návāha coto ndee rī rohó núu cuatáhú váha ró jniñu ndácu ri nuū rō. ¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē manī rī jíin ró jíto jíinúú Cristo. ¹¹ Chi cánuú cone cáhnu ni yō, chi tu cúni yō jeē nihín Satanás cuēchi siquī yō, chi je jíni vāha yó ndese ndúcú un stáhú yóhó sáha yó cuéchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ni íyo modo jeē nácani ri jnūhun ya. ¹³ Te vēsú súcuan te tu ní íyo nayúú ni anuá rī, chi tu ní níjnáhan ri jíin hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnūhun jeē cujéhnu ndúú yó jíin Cristo

¹⁴ Te na cútahū yō nuū Yaā Dios, chi níní ndéca vāha ya yohó cuángoo yó jíin Cristo Jesús, te ndúú yó jíin yá jeē cujéhnu ndasí yá snāā yā poder ndihí enemigo yā. Te jéjníñū ya yohó jéē scuité núu yó jnūhun ya tācá-ni lugar, nájñūhun jíte núu ññ xicō asīn. ¹⁵ Te cúu yó nájñūhun ññ sūje jeē jeén asīn nuū Yaā Dios sáha Cristo. Te nájñūhun jeē jinú xicō un núu ñáyuu cācu ánuá jíin núu ñáyuu jnahnū ndetū. ¹⁶ Nuū ñáyuu jnahnū ndetū chi cúu yó nájñūhun ññ xicō jeē cúu i sáha, te nuū ñáyuu cācu ánuá chi cúu yó nájñūhun ññ xicō váha jeē cótecu i sáha. Te ni ññ yó ma cánda yó sáha yó jniñū yáha, te núu ma chindéé ñáhán yá yohó. ¹⁷ Te ruhū jijnáhan ri, tu cásáha ri nájñūhun cásáha cuehē tēe jeē cánducú de nihīn de xūhun síquī jñūhun Yaā Dios. Chi sa cánacani ndaā rī jñūhun ya, chi máá Yaā Dios ni tají rúhū, te máá yá jiní jeē cánacani ndaā rī síquī jeē cáncandíje ri Cristo.

Jñūhun síquī contrato jeé

3

¹ Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jíni ññhún jéē steén rī carta recomendación nuū rō, chí jéē cacán rī cuāha ró núu rī jijnáhan ri, nájñūhun cásáha sava i? ² Tuú chi máá-ni ró cácuu nájñūhun ññ carta recomendación rī. Te jeē ññhún ni rī jeē ní cacandíje vāha ró ni sáha ri, suu cúu nájñūhun jeē yosó jñūhun carta un ini anuá rī. Te ndihí ñáyuu chi nájñūhun cáhu i, cúu jeē jiní i ndese ni nasāma ró. ³ Chi máá ró cácuu nájñūhun ññ carta jeē ní tee Cristo te cáscáca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájñūhun ni tee ya ley yā, chi sa suhva nuū anuá ñáyuu ni tee ya.

⁴ Te cácahān rī sícuan, chi cácucahnu ni rī Yaā Dios siquī jeē ni sáha Cristo. ⁵ Te nasūu jéē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri. ⁶ Te máá yá ni sáha jeē cuu cuajniñu vāha ri siquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō níí cáni.

⁷ Te ley jenahán jeē ni jéhe ya nuū Moisés, ni yosō letra nuū tabla yuū. Te yōhyo ni kujéhnu, te ni ndindēē ndasí ni sáha, te nde Moisés ndíi nuū de ni sáha. Te tu ní cúu coto vāha ñayuu Israel nuū de ni sáha. Te vēsú sícuan te cuéé-ni cuéé-ni ni ndahvā jeē ndíndēe núū de. Te núu sícuan ni kujéhnu ndasí ley jeē sáha jeē cuu ñayuu te jnahnū ndetū i, ⁸ te sa víhyá gā kujéhnu ndasí gá jnūhun cotecu yō jeē jéhe Espíritu nuū yō. ⁹ Chi núu yōhyo ni kujéhnu ley un jéē jnahnú ndetū ñayuu sáha, te sa víhyá gā kujéhnu jnūhun jeē ndáhva Yaā Dios cuēchi yó. ¹⁰ Chi ley un jéē ní kujéhnu nde saá, tuá kujéhnu cuiti, siquī jeē kujéhnu ndasí gá jnūhun Espíritu jeē iyó vijna. ¹¹ Te núu sícuan ni kujéhnu ley jeē ní íyo jecu-ni tiempo, te sa kujéhnu ndasí gá jnūhun jeē coo níí cáni.

¹² Te jeē sícuan cáñuhun ni rī, jeē yúcuan cáhīyo téyí ni rī nácani ri jnūhun yáha. ¹³ Chi tu cásáha ri nájnūhun ni sáha Moisés jeē ní jesi de ñin sahma nuū de, návāha tú coto ñayuu Israel ndese cuandahvā jeē ní ndindēe núū de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jési sahma un núū jeē níjnūní i, te tu cújiyo cuiti. Chi nde jeē candíje i Cristo, yūcuán na te cujiyo. ¹⁵ Te suni sícuan nde vijna núu cácahu i tutu ley Moisés, te nájnūhun jeē jési ñin sahma nuū jeē níjnūní i.

¹⁶ Te jeē násāma ini ññ ñayuu quīvi i nuū maá Jítóho yō Cristo, yūcuán na te cújiyo-ni jeē jési ún. ¹⁷ Chi Jitoho yō cúu maá Espíritu. Te nuū íne Espíritu maá Jítóho yō, yūcuan cúu nuū iyó libre ñayuu jeē tuá yáhi i chíji ley jenahán. ¹⁸ Te jeē yūcuan maá yó jijnáhan yó, tuá jési nuū jeē níjnūní yō. Chi cácuu yó nájñūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnū maá Jítóho yō. Te maá yó tāca quívī cuanasāma yó cuanduu luu ga anuá yō nájñūhun cáa maá yá. Chi maá Jítóho yō jeē cúu ya Espíritu, súcuan sáha ya jíin yó.

4

¹ Núu súcuan te tu ndínuu ni rī cánacani ri jñūhun ya. Chi siquī jeē ní cundáhú ni yā ruhū jijnáhan ri te ni jéhe ya jniñu yáha nuū rī. ² Te tu cásáha ri jniñu néé jéé cúcanu yō sáha, ni tu cájica cuu ri jíin jñūhun ndíchí stáhú, ni tu cásama ri jñūhun Yaā Dios. Chi sa suhva cácahān rī máni jñūhun ndaā. Te súcuan te cuu cuni tāca ñáyuu ini anuá i jeē cácahān ndaā rī jíto jíinúū Yaā Dios. ³ Te núu iyó ñáyuu tu jécūhun ni jñūhun jnama ya yohó jéé cánacani ri, te súcuan cúu nuū máni maá ñáyuu jñahnū ndetū. ⁴ Te jeē tu cácañdije i, te maá jéxeén jeē ndácu jniñu ini ñayīvi yáha, ní jesi nuū jeē níjnūní i, návāha ma ndíndēe jñūhun Cristo ini anuá i, te ma cúni i jeē yóhyo luu cújéhnū Cristo, Yaā jeē ínuú cáa jíin Yaā Dios. ⁵ Te jeē cánacani ri jñūhun, te nasūu jñūhun maá rí, chi sa suhva jñūhun Jitoho yō Jesucristo cánacani ri. Te maá rí chi cácuu ri mozo-ni nuū rō jijnáhan ró jéé siquī jeē maní rī jíin Jesús. ⁶ Chi ná ni sáha Yaā Dios ñayīví te ni cahān yā jeē na cúndijin nuū néē. Te suni súcuan ni sáha ya jeē ní cundijin nuū anuá yō jeē cájecūhun ni yō siquī Jesucristo, ndese ndíndēe núu yā, cúu jeē yōhyo luu cújéhnū ya nájñūhun cúu Yaā Dios.

Jeē cándiquīn yō jñūhun cácañdije yó yá

⁷ Te tāca jnúhun yáha jeē yóhyo luu cújéhnu, chi nájnūhun jeē ñuhun ini ñn quísi ñuhun. Chi cácuu yó nájnūhun quísi ñuhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder siquī jnúhun yáha jeē yóhyo luu cújéhnu, te nasūu fuerza maá rí cúu. ⁸ Te jeē yúcuan, vēsú tāca lado cájito ri jnūndóho, te tu sáha jeē ma ndúsī gā ni rī. Te vēsú cácuuíhyá ni rī siquī jnūndóho, te cáñuhun ni rī jeē quee vāha jniñu ri. ⁹ Te vēsú cájito xeē ñayuu ruhū, te máá yá tu stóo ya ruhū jijnáhan ri. Te vēsú cánducú i snáa i ruhū jiñ jniñu sáha ri, te ma cúu. ¹⁰ Te ndé-ni cúu nuū cuángoo ri, te nájnūhun ni ndoho Jesús jeē ni jhī yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī. ¹¹ Chi jeē niní cátecu rī, te tāca quívī je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiqui cúñu rī jeē cúu. ¹² Núu súcuan te ruhū jijnáhan ri, níní cúu jeē jé yajni cuu rī siquī jnúhun ya, te yūcuan sáha jeē cotecu maá ró ñí cáni jijnáhan ró.

¹³ Te yósó núu tútu iī: Ni candíje ri te jeē yúcuan ní cahān rī, achí. Te suni jeē cáccandíje máá rí cúu jeē cánacani ri jnūhun ya. ¹⁴ Chi cájini rī jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndihī yó núu yā. ¹⁵ Chi tāca jnūndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē váha i. Yūcuán na te suni yóhyo cuehē i nacuatáhú i nuū Yaā Dios, te kujéhnu ga yā sáha.

¹⁶ Jeē yúcuan cúu jeē tu ndínuu ni rī, te vēsú cuandihī fuerza yiqui cúñu rī, te sa suhva cuanduu fuerza gā anuá rī tāca quívī. ¹⁷ Chi jnūndóho jeē ndóho yó ñayīvi yáha, tú-ni xeē cúu, te yachī yāha. Te sáha jeē nihín yō ñn tahū jeē kujéhnu yó ñí cáni jeē cáa ndasí gá vēsú jnūndóho ún.

¹⁸ Te tu táñúhún yó nuū tāca jnúndóho jíto yó núū vijna, chi sa suhva táñúhún yó nuū tāca jéē váha jeē tu jíto yó núū vijna. Chi tāca jéē jíto yó núū vijna, chi yachī ndīhi, te tāca jéē tu jíto yó núū, chi coo níí cáni.

5

¹ Chi yiqui cúñu yō jeē ndeé yó ñáyīvi yáha, cúu nájñūhun ñn vehe jeē náā. Te cájini yō jeē núu na náā, te cuāha Yaā Dios ñn yiqui cúñu jeé, te suu cúu nájñūhun ñn vehe jeē coo níí cáni ichi ándiví. Te nasūū ñn vehe jeē sáha ñayuu cúu, chi jeē sáha Yaā Dios cúu. ² Te níni jéē ndeé yó vehe yáha jeē cúu yiqui cúñu yō, te cájítū ni yō sáha, chi yōhyo cúní yō jeē núcūhun yó yiqui cúñu jeé yó nde ándiví. ³ Chi jeē núcūhun yó un, te ma cóo máá na anuá yō jeē náā yiqui cúñu yō yáha. ⁴ Chi níni jéē iyó gá yō ini vehe yiqui cúñu yō yáha, te jíttū ni yō te cúcuñhá ni yō. Te nasūu jéē cúní yō jeē stóo yó yiqui cúñu yō te coo máá-ni ánuá yō. Chi sa suhva cúní yō nucūhun yó jéē jeé, návāha ndahvā yiqui cúñu yō jeē náā, te coo máá jéē cótecu níí cáni. ⁵ Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndāā ni yō jeē cuáha Yaā Dios tahū yō.

⁶ Núu súcuan te níni cúu jeē cá cucáñnu ni rī. Chi cájini rī jeē níni ndeé gá rī chíji yiqui cúñu yáha, te jíca cúu ri jíñ núū ndeé máá Jítoho yō. ⁷ Chi vijna chi cá candíje ri jeē iyó yá jíñ rí, vēsú ná tu coto ri nuū yā. ⁸ Te cá cucáñnu ni rī, chí sáha ri cuenta jeē váha ga núu na quénda ri chíji yiqui cúñu yáha te quihñ rī condee rī jíñ máá Jítoho yō. ⁹ Jeē yúcuan cúu jeē cánducú ndéyí rí sáha ri jeē cusñ ni yā jíñ rí, vēsú núu ndeé gá rī yiqui cúñu rī chí vēsú núu condee rī jíñ yá. ¹⁰ Chi cánuú jéē ndīhi yó cuiñi yuhu mesa Cristo jeē sándaā yā jniñu yó. Te ná ñn ná ñn yó níññ yō síquī

ndese ni casáha yó, á jéē váha chí jéē neé, ná ni condee yō chíji yiquí cúñu yō.

Siquī jeē ndívicoo yó núū jnúhun manī Yaā Dios jíín yó

¹¹ Núu súcuan te cándiso īyo ri nuū maá Jítóho yō, te jeē yúcuan ndúcú ndéyí rí scandíje ri ñayuu. Te jííní Yaā Dios jeē cáhīyo ndaā rī, te ñúhun ni rī jeē suni súcuan cájini maá ró. ¹² Te nasūu jéē cánducú tucu ri cahān rī jeē váha ga tēe cácuu ri, chi sa suhva cástūhun rí jeē cuu cusī ni rō jeē siquí rī jijnáhan ri. Te súcuan te cuu stío cuíñí rō nuū ñáyuu jeē cutéyí i siquí ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeē tēe loco cácuu ri jeē cácahān rī súcuan. Te siquí jeē cándihvī ni rī jehē Yaā Dios cúu. Te tuú chi cáhīyo váha xinī rī, te jeē yúcuan cájejníñu ri jeē quéndōo váha ró. ¹⁴ Chi siquí jeē ní cundáhú ni Cristo ruhū jijnáhan ri cúu jeē cánuú nacani ri jnúhun ya. Chi cájini váha ri jeē ni jíhī mañúhún-ni ya jeē siquí ndíhi yó, te jeē yúcuan nájnūhun ni jíhī ndíhi yó jíín yá. ¹⁵ Chi ni jíhī yā jeē siquí ndíhi yó návāha tāca yó jéē técu, ma cótecu ga yō jeē sáha yó jéē cuní maá yó, chi sa suhva jeē cuní maá yá jeē ni jíhī yā te ni natecu yā jeē siquí yō. ¹⁶ Jeē yúcuan tuá casáha ri cuenta ndese-ni cándāa ñayuu, nájnūhun casáha ñayuu ñayīví. Te vēsú súcuan ni casáha ri cuenta siquí Cristo nde saá, jeē ĩn tēe-ni cúu ya, te vijna chí cájini rī jeē cúu ya Sēhe Yaā Dios. ¹⁷ Chi núu ĩn ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndíhi.

¹⁸ Te Yaā Dios cúu jeē sáha ndíhi jeē yáha, chí jíín Cristo ni sáha ya jeē ní ndívicoo yó núū jnúhun manī yā jíín yó. Te ni tejnīñu ya ruhū jeē cánacani ri jnúhun jeē ndívicoo ñayuu nuū jnúhun manī yā jíín i. ¹⁹ Chi jíín Cristo te ni sáha Yaā Dios jeē ñáyuu ñayīví ndívicoo i nuū jnúhun

manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnūhun yáha ndese ndívicoo i nuū jnúhun manī yā jíin i. ²⁰ Núu súcuan te cácuu ri tēe cájica jniñu máá Cristo. Te jeē cahán rī, te nájñūhun jeē maá Yaā Dios cahán ndahú yá jíin ró. Núu súcuan te cácahān ndahú rí jíin ró jeē cahán Cristo, jeē na ndívicoo ró núu jnúhun manī Yaā Dios jíin ró. ²¹ Te Cristo, vēsú tú ni ñin cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéé yíhi ndaha Cristo, ni nucondee síquī yō jeē iyó ndāā yō nájñūhun íyó ndāā Yaā Dios.

6

¹ Núu súcuan te síquī jeē cácuu ri tēe casájniñu jíin yá, te cácahān ndahú rí jíin ró jeē ma stóo uun ró jnúhun jeē ni sáha Yaā Dios jeē váha róhó. ² Chi áchí yá nuū tútu ii: Máá tiempo cuní maá rí te cuni sōho rí jnūhun cáhān ndahú ró jíin rí.

Te máá tiempo jnáma ri ñayuu, te jnama ri rohó. Achí yá. Te vijna-ni cúu máá tiempo jeē cuní yā, chi vijna-ni cúu tiempo ni quiiji Yaā jnáma yóhó.

³ Te cánducú rí jeē ma sáha ri ni ñin jniñu jeē casi jeē candíje ñayuu, návāha ma cahán i síquī jniñu ndíso ri. ⁴ Chi sa suhva cánducú rí jeē ndíhi jeē sáha ri, steén jeē cácuu ri tēe cájiejniñu nuū Yaā Dios. Jeē yúcuan cájendeyí ni rí jíin jéé ndóho ri jnūndóho, jíin jéé cúmanī nuū rī, jíin jéé yí sáha jíin rí. ⁵ Chi ni ñyo tijni jíinu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu nihin ri, jeē ní cajehni rī māhna máá rí, jeē ní cahīyo ndite ni rī. ⁶ Te suni cánducú rí jeē cuajnúhún i ruhū síquī jeē ndoo cájica ri, te cájecūhun vāha ni rí jnūhun ndāā, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rí jnáhan

ri. ⁷ Te cánacani ndaā rī jnūhun, te poder Yaā Dios íne jíin rí. Te jíin jnúhun ndaā cándahva rī tācá jniñu néé, chi nájnūhun jeē cájejnáhan ri siquī. Chi nájnūhun jeē ndónnda un síquī rī te ndónnda ri siquī. ⁸ Iyó jínu yñúhún ñayuu jíin rí, te íyó jínu tuú. Iyó jínu jéjnúhún i ruhū, te íyó jínu cácahān i siquī rī. Iyó jínu cácahān i jeē téé stáhú cácuu ri, te íyó jínu cácahān i jeē téé ndaā cácuu ri. ⁹ Iyó jínu cásáha i nájnūhun jeē tu jíin i ruhū jijnáhan ri, te íyó jínu jeē jiní vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha. ¹⁰ Te vēsú iyó jéē cácuuñhyá ni rī, te níni cácusī ni rī. Te vēsú téé ndáhú cácuu ri, te sácúcá rí cuehē ñayuu jíin jnúhun ya. Te vēsú tú na vé cánevāha ri, te jíin máá yá te ndihī-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jíin ró jijnáhan ró, chi siquī jeē maní rī jíin ró, jeē yúcuan cáchí ndihī ri ndese cándoho ri. ¹² Máá rí jijnáhan ri cácahān cají rí siquī jeē maní ndasí rí jíin ró, te máá ró jijnáhan ró sanaa te tu súcuan cúu. ¹³ Nájnūhun cáhán tatá jíin séhe, súcuan cáhán ndahú rí jíin ró jeē nájnūhun íyó maní rī jíin ró, súcuan na cóo maní tucu ró jíin rí.

Siquī jeē cúu yó templo Yaā Dios

¹⁴ Ma quívi nduu rō jíin jniñu néé cásáha ñayuu tu cácañdije, chi ma cúu coo inuú ró jíin i. ¿Chi ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyúcú inuú ñayuu cájica jíin luz yā jíin ñayuu cájica nájnūhun nuū néé? ¹⁵ ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácañdije jíin ñayuu tu cácañdije? ¹⁶ ¿Te ndese cuu quijnáhan templo Yaā Dios jíin ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájnūhun ni cahān yā:

Condee rī ini i te caca cuu ri mēhñú i,

te cuu ri Yaā Dios maá i,
te cuu i ñayuu maá rí.

¹⁷ Te jeē yúcuan ní cahān gā yā:

Ma quívi nduu rō jíin jniñu néé cásáha i,
te cusñin ró jijnáhan ró, áchí Jítóho yō.

Te ma jnñi ró tāca jeē tú ndaā.

Yūcuán na te naquihin ri rohó,

¹⁸ te cuu ri Tatá rō jijnáhan ró,

te cuu ró séhe yíí rí jíin séhe sñhí rí,

áchí Jítóho yō, Yaā jnñi ndiñi poder.

Achí tutu.

7

¹ Núu súcuan, ñánī mánī, cánevāha yó tāca jnúhun yáha jeē ni jéjnūhun ya. Jeē yúcuan na sándoo yó máá yó tāca jeē sajnéhén yiqui cúñu yō jíin ánuá yō. Te na cónso iyo yó núu Yaā Dios, te coo ndoo coo iñ yō nuū yā jíin ndiñi jniñu cúní yā.

Jeē ní canacani ni ñayuu Corinto siquī cuéchi i

² Coo manī rō jíin rí jijnáhan ró víi. Chi tu ní sáha ri falta nuū ní iñin ró, te tu ní stívi rí anuá ni iñin ró, te ni iñin ró tu ní stáhú rí. ³ Te nasūu jeē nducú rí cahān rī nuū rō cúu jeē cahān rī súcuan, chi je ni cahān rī jeē yóhoyo manī rī jíin ró. Te níní ñúhun ni rī rohó, vēsú cuu yō chí cotecu yō.

⁴ Te cúcáhnū ndasí ni rī rohó jijnáhan ró, te cúsiñ teyí ni rī jeē siquí rō. Te vēsú cájito ri tāca jnúndóho yáha, te íyó ndeyí ni rī te cúsiñ ndasí ni rī jeē siquí rō.

⁵ Ná ni jengoo ri Macedonia te tu ní íyo nayúu ni anuá rī, chi sa suhva yíí ní iyo jnúndóho jíin rí tāca lado. Chi ni iyo jeē ní castáhān jnáhan jíin rí, te ni cayūhu rí sanaa te caca yátá ñayuu cávandíje. ⁶ Te Yaā Dios jeē sáha jeē ndúndeyí ni ñayuu cávcuñhyá ni, ni sáha ya jeē ní candundeyí ni rī, chi ni quiñi Tito ni sáha ya. ⁷ Te ni candusiñ ni rī, nasūu

máá ñn-ni siquī jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jín jéē cácuquíhyá ni rō jeē siquí cuéchi ró, jín jéē cánacani ni rō jehē rī. Te jeē yúcuan ní cusī gā ni rī.

⁸ Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cúhyá ni rī jeē ní sáha súcuan. Chi vēsú ni cucuíhyá ni rī saá, te vijna te tuá, chi jín rī jeē jecu-ni quivī ni cacucuíhyá ni rō ni sáha. ⁹ Te vijna te cúsī ni rī, te nasūu síquī maá jéē ní cacucuíhyá ni rō. Chi cúsī ni rī jeē ní jejnínū jeē ní cacucuíhyá ni rō, chi ni sáha jeē ní canacani ni rō siquī cuéchi ró. Chi ni cacucuíhyá ni rō nájnūhun cúní maá Yaā Dios, te nasūu jéē ni sáhuhū rī rohó. ¹⁰ Chi núu cúcuquíhyá ni yō nájnūhun cúní Yaā Dios, te suu sáha jeē nácani ni yō siquī cuéchi yó te jnama ya yohó, te ma cóo ga jeē nácani cúhyá ni yō. Te jeē cácuquíhyá ni ñayuu tu cácandije, tu jéjnínū jeē nácani ni i, chi sa jnahnū ndetū i. ¹¹ Te ni cacucuíhyá ni rō nájnūhun cúní Yaā Dios, te vijna te cájito ró náa vāha ni jejnínū. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū téē ni sáha cuéchi, te ni cayūhu ró jeē ní castívi ró núū yā. Yūcuán na te yōhyo ni cacuni rō coto tucu ró núū rī, te yōhyo ni candihvī ni rō ni cacuxeēn rō nuū téē ni sáha cuéchi ún. Te súcuan ni castéén rō jeē tú cuéchi ró, chi tu ní cájejnínūhún ró cuéchi ni sáha téē ún. ¹² Te jeē ní tee ri carta un, nasūu máá-ni jeē cúxeēn rī nuū téē ni sáha cuéchi ún, ni nasūu máá-ni jeē cahán rī jehē téē ni ndoho ni sáha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jínúū Yaā Dios. ¹³ Jeē yúcuan ní candusī ni rī jeē siquí rō.

Te víhyá gā ni cacusī ni rī jeē ní jini rī jeē cúsī ni Tito, chi ni nduu nayúú ini de ni casáha ró. ¹⁴ Chi je ni cahán rī

jiín de jeē cúsiñ ni rī jeē váha ñayuu cácuu ró, te vijna te tu ní quéndōo ri jnūhun canu jeē siquí rō. Chi nájnūhun ni cajini rō jeē iyó ndáa tāca jnúhun ni cacahān rī jiín ró, suni súcuan ni cundaā jnūhun ni cacahān rī jiín Tito jeē cúsiñ ni rī siquí rō jeē váha cásquícu ró. ¹⁵ Te víhyá gā manī de jiín ró vijna jeē ñúhun ni de jeē vāha ni cajetáhú ró jeē cahán de, te ni cahīyo yíñúhún ró ni candiso iyo ró núu de. ¹⁶ Núu súcuan te cúsiñ ni rī siquí jeē cucáhnu ndasí ni rī rohó jijnáhan ró.

Jeē na cúsiñ ni i socō i cuehē

8

¹ Hermano, vijna te suni cácuu rī castūhun rí nuū rō jijnáhan ró ndese cuehē jeē váha ni sáha Yaā Dios jiín ñayuu cácandíje cáyūcú Macedonia. ² Chi vēsú yōhyo ni jito ndee jnūndóho i, te suni yōhyo ni cacusiñ ni i jiín jnúhun ya. Te vēsú ñayuu ndahú ndasí cácuu i, te yōhyo vāha ni cajequin i cuehē xūhun jéé cúu ñayuu ndahú cácandíje. ³ Chi cúu ri testigo jeē ní cacusiñ ni maá i ni cajēhe i ndésaa ni canda i, te nde vihyá gā ni cajēhe i. ⁴ Chi ni cacahān ndahú ndasí i jiín rí jeē na cuāha ri jnūhun chindéé ñáhán i jiín yó cuāha i xūhún cuu hermano cándoho ndáhú. ⁵ Te víhyá gā ni casáha i vēsú jeē ní cajeni ni rī, chi xihna gā ni casocō i máá i nuū Jítoho yō, te sáa te ni cajēhe i máá i sáha i tāca jéé cácuu rī, ndihni ndese nújnahan ni Yaā Dios. ⁶ Te jeē súcuan ni casáha ñayuu Macedonia, te ni castíhvī ni rī Tito jeē na jéé tucu de nuū maá ró, sáha de jeē jīnu jniñu jeē ni squéjéé de jiín ró jeē suni caquin rō cuehē xūhún cuu ñayuu ndahú. ⁷ Chi máá ró yōhyo vāha casáha ró táca-ni, chi vāha cácandíje ró, vāha cánacani ró jnúhun, vāha cájecūhun ni rō, vāha cándíhvī ni rō, vāha manī rō jiín rí jijnáhan ri. Núu súcuan

te suni cánuú sáha vāha ró jniñu yáha jéē cuáha ró jéē cúu ñayuu ndahú.

⁸ Te nasūu jéē cuní rī ndacu ri jniñu nuū rō, chi sa cástūhun rí nuū rō ndese yōhyo cácusī ni sava ga ñayuu jéhe i xūhún, te súcuan te cuni rī jeē suni máá ró cákundáhú ndije ni rō ñayuu ndahú. ⁹ Chi je cájini rō ndese yōhyo vāha ni Jitoho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andíví núú. Te súcuan ni sáha ya jeē cá cucú cá ró ndīhi jeē ndíso jnūhun ya, siquī jeē ní nasáha ndáhú yá maá yá.

¹⁰ Te jeē váha máá ró cúu jeē na cáchi rī ndese jéni ni rī siquī jniñu yáha. Vāha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sáha ró. ¹¹ Núu súcuan te vijna te sínu ró. Te nájñūhun ni cacusī ni rō ni caquejéé ró jíin, suni súcuan na cúsi ni rō sínu ró, chi cuāha ró núu ndese cánevāha ró. ¹² Chi núu cúsi ni yō cuāha yó, te jétáhú yá núu ndese névāha yó, chi tu jícan yā jeē cuāha yó jéē tu névāha yó.

¹³ Te nasūu jéē cahán ri jeē cáhni ndahú ró máá ró jeē cáa ga nihīn i vēsú jeē ndóo nuū máá ró. ¹⁴ Chi sa suhva jeē ĩn cūhva-ni conevāha ró jíin i. Chi cánevāha cuehē rō vijna, te cuu cuāha ró jéē cúmanī nuū i. Yūcuán na te núu ndé ĩn quiivī conevāha i, te suni cuu cuāha i te núu ni cumanī nuū rō. Te súcuan te ĩn cūhva-ni conevāha ró jíjnáhan ró, ¹⁵ nájñūhun cáhán tutu ĩi siquī ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jíin úu gā jnáhan de

¹⁶ Te na cútahū rī nuū Yaā Dios jeē ni sáha ya jeē ndīhvī ni Tito jehē rō nájñūhun cándīhvī ni máá rí. ¹⁷ Chi ni jetáhú de jeē ní cacahān rī jíin de jeē jeé de nuū rō. Te

siquī jeē ndīhví ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cátají rí ñin hermano cuajeē jíin Tito nuū rō. Te tāca grupo ñayuu cácaandíje cájejnúhún i tēe un jéē váha jéjníñu de siquī jnúhun jeē jnáma ya yohó. ¹⁹ Te tāca grupo ñayuu cácaandíje suni ni catee i jniñu siquī de jeē cáca de jíin rí chindéé ñáhán de quindēca de xūhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chi cuni i ndese yóhyo cácusī ni rō cásocō rō xūhún. ²⁰ Te quingoo ndindúú rí návāha ni ñin ñayuu ma tēe i cuēchi siquī rí siquī xúhun cásocō ñayuu. ²¹ Chi ndúcú rí jeē squícu ndaā rí tācá jniñu, nasūu máá ñin-ni nuū Yaā Dios, chi suni nuū ñayuu.

²² Te suni cátají rí inga hermano yō cuajeē de jíin ndindúú tēe yáha. Te tijni jínu ni steén de jeē yóhyo cúsi ni de ndīhví ni de tācá jniñu. Te vijna chi ndīhví gā ni de jehē rō, chi cúcáhnun ndasí ni de jeē cásquícu ró. ²³ Te núu cácajnúhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácaandíje, te cáhīyo yíñúhún de nuū Cristo. ²⁴ Núu súcuan te stéén rō nuū de jeē cáhīyo manī ndije ró jíin de, návāha na cúni tāca grupo ñayuu cácaandíje. Te súcuan cuni i jeē tu ní cácusī cahá ni rí siquī rō.

Siquī jeē cájequin i xūhún cuu tācá hermano

9

¹ Te vijna te tuá jíni ñúhún tee ri nuū rō siquī xúhun jeē cájequin rō cuu tācá hermano cándoho ndáhú. ² Chi je jíni rí jeē cánujnahan ni rō cuāha ró. Te jeē yúcuan máni cúsi ni rí cahán rí jíin ñayuu Macedonia jeē rohó

ñáyuu Acaya, je ni casátūhva ró xúhun ndé jendujin. Te jeē súcuan ni cacushī ni maá ró, te jeē yúcuan cuehē ñayuu Macedonia ni cacondihvī ni i ni cajēhe máá i. ³ Te tájí rí ndinúní hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnūhun ni cahān rī jeē squícu vāha ró jíin jniñu ún. Chi coo tūhva ndije ró jíin xúhun nájñūhun ni cahān rī jíin i. ⁴ Chi sanaa te jecoo jecu tēe Macedonia jíin rí, te núu cuni de jeē tu cáhiyo tūhva ró, te coo jñūhun canu nuū rī, te suni nuū maá ró jijnáhan ró, chi ni cahān teyí rí jeē cáhiyo tūhva ndije ró. ⁵ Jeē yúcuan ní jeni ni rī jeē cánuú cahān rī jíin táca hermano yáha jecoo de xīhna gā, te sáá te jinū rī, návāha sthíví ni de róhó jéé yáchī na cóo tūhva xūhun jéé ní cacahān rō jeē cuáha ró. Te súcuan te coo tūhva siquī jeē váha ni rō, te nasūu jéé safuerza rī rohó.

⁶ Cocuhun ni rō jñūhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tíhli-ni nastútú. Te tēe jeē táji cuehē, suni cuehē nastútú. Achí tutu. ⁷ Tācá ĩn ĩn ró cuāha ró ndésaa ni tee ni rō. Ma cúxii ni rō cuāha ró, chi nasūu fuerza cúu. Chi Yaā Dios maní yā jíin ñáyuu jeē cúshī ni cuāha. ⁸ Te máá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níiní coneváha ró ndihi tācá jeē jíini ñúhún ró, te coo sobra gā jeē cuāha ró jéé cúu tācá jniñu váha. ⁹ Chi súcuan cáhan tutu ĩi siquī tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ní cání.

Achí tutu. ¹⁰ Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹ Súcuan cucúcá ró jíin táca-ni, návāha cuu cuāha cuehē rō. Te xūhun jéé cuáha ró quíhīn nuū hermano cándoho ndahú, suu sáha jeē nácuatáhú i nuū

Yaā Dios. ¹² Chi xūhun jēē cuáha ró núū i, nasūu máá ñn-ni jeē nihín i jeē cúmani nuū i, chi suni sáha jeē nácuatáhu ndasí i nuū Yaā Dios. ¹³ Te cahān i jeē yóhoyo vāha Yaā cúu Yaā Dios, chi xūhun jēē ní cajēhe ró stéén jeē váha cácandíje ró jnúhun Cristo. Te suni sáha jeē cahān i jeē yóhoyo cújéhnú Yaā Dios siquī jeē ní cajēhe cuehē rō nuū i jíin núū sava ga ñayuu. ¹⁴ Te suni cacān tahu i jehē rō, chi coo manī ndasí i jíin ró siquī jeē yóhoyo vāha ni sáha Yaā Dios jíin ró. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ñn tahu cáhnu ndasí jēē ma cánda cuiti yō castūhún ndíhi yó.

Jeē ndíso jniñu Pablo cúu de apóstol

10

¹ Te ruhū Pablo, cáhán ndahú rí jíin ró jijnáhan ró jíin modo maá Cristo jeē vítá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jícá rí te tu yúhú cuiti rī cahān nihín ri jíin ró, cácahān rō. ² Núu súcuan te cáhán ndahú rí jíin ró jeē núu na jéé rī te ma cahán rō jnúhun jeē sáha jeē cuxeēn rī nuū rō. Chi sava ró cácahān jeē casáha ri jniñu ya siquī jeē máni jeē na níhín rī siquī ún. Núu súcuan te íyó túhva ri cuxeēn rī nuū ñáyuu cácahān súcuan. ³ Chi vésú cácuu ri ñayuu cáyūcú ini ñayíví, te tu cájejnáhan ri modo cájejnáhan ñayuu ñayíví. Chi nájnūhun jeē cájejnáhan ri siquī tācá jniñu neé. ⁴ Chi nasūú ndajniñu ñayíví jéjníñu ri cájejnáhan ri, chi jíin poder Yaā Dios cájejnáhan ri snáa rī tāca fuerza jeē cúu contra siquī yā. ⁵ Súcuan cásnáa rī tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi ri nuū ndíhi jeē tú vāha jeē cájeni ni ñayuu, návāha cuandetū i nuū Cristo. ⁶ Te jeē jíinu cuandetū vāha máá ró, yūcuán na te coo túhva ri cuáha ri castigo nuū tāca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan ri. ⁸ Te núu ni cahān teyí rí jíin ró jeē ndíso jniñu ri, te tu cúcanu rī sáha. Chi máá Jítóho yō ni tejníñu ya ruhū jijnáhan ri, návāha sáha ri jeē ije ánuá rō jíin jnúhun ya, nasūu jéē snāā rī. ⁹ Núu súcuan te tu cúní rī jeē cáni ni rō jeē nducú rí siúhú rí rohó jíin carta rī. ¹⁰ Chi cácahān sava ró jéē tāca carta rī yōhyo stíhví ni te nihin ndácu jniñu, te sa suhva núu ndéé rí jíin ró te tu cūndeyí ni rī ndacu nihin ri jniñu, te suni tu cúu cahān vāvíhí rí, achí ró. ¹¹ Te ñayuu cácahān súcuan na sáha i cuenta jeē nájnūhun nihin cáhān carta rī jeē íne jíca rí, suni súcuan nihin ndacu ri jniñu nuū rō jeē cóndee rī jíin ró.

¹² Te va ma chūndeyí cuiti ni nde ri jeē sajuhnu ri maá rí, nájnūhun cásáha sava tēe un jéē cájejnúhún nde de máá de. Tāca tēe ún chi cáacunéé de jeē cájeni ni de jeē cujuhnu ga de vēsú jnáhan de, te tu cásáha de cuenta ndese cúní Yaā Dios jeē caca de. ¹³ Te ruhū jijnáhan ri, chi cutéyí nde ri maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jéhe jnūhun jeē ni jínū rī nuū rohó ñayuu ñuu Corinto. ¹⁴ Jeē yúcuan ná ni jinūcoo ri nuū rō jeē xíhna ñúhún te nasūu jéē ni yáha ri nuū cúhva jniñu ní jéhe ya nuū rī. Chi xíhna gā maá rí ni jinūcoo nuū rō ni canacani ri jnūhun vāha Cristo. ¹⁵ Te tu cácutéyí rí siquī jniñu ní casáha inga tēe, nájnūhun jeē jniñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níní máá cúhva jeē ni jéhe ya nuū rī. ¹⁶ Yūcuán na te cácuni rī scuité núu ga rī jnūhun jnáma ya yohó núu tāca gá ñuu yúcu ndé yūcuán gá. Te súcuan te ma quívi nduu rī cutéyí rí nuū jeē jé ni canacani inga tēe jnūhun.

¹⁷ Te núu ndé tée cúní de cutéyí de, na cútéyí de siquī jeē sáha máá Jítóho yō, nasūu síquī jéē sáha máá de. ¹⁸ Chi nasūu tée jeē jejnúhún máá cúu jeē quéndōo yíñúhún, chi sa suhva tée jeē jejnúhún máá yá.

Jeē cahán Pablo siquī tée cánacani jnūhun stáhú

11

¹ Cone cáhnu ni rō jijnáhan ró jeē cahán rī jecu jnūhun modo nájnūhun cácahān ñayuu canéé. Núu súcuan te cáhnu coo ni rō víí. ² Chi cúcuñí rí jehē rō jijnáhan ró, nájnūhun cúcuñí Yaā Dios. Chi cácuu ró nájnūhun ñin sūchi síhí íyó ndoo, te ni sáha ri jeē quijnáhan ró jíin Cristo, nájnūhun quijnáhan ñin sūchi síhí jíin máñúhún-ni yí i. ³ Te yúhú rí sanaa te cuāha ro jnúhun stáhú táca tée un róhó, te siáá rō jnūhun jeē chiñúhún ndāā rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini ñin coō, te ni stahú un ña jíin jnúhun ndíchí stáhú. ⁴ Chi núu quíjicoo tēe nuū rō jeē tu cánacani ndāā de jnūhun Jesús nájnūhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró núu inga espíritu jíin núu inga jnūhun jeē tu quijnáhan jíin Espíritu jíin jnúhun jeē ní cacandíje ró jéē jnáma ya rohó. ⁵ Te tāca tēe cacandíje ró un jéē cácahān jeē apóstol cujéhnu ga cácuu, tú cuíti jeē cujéhnu ga nde de nuū rī. ⁶ Chi vēsú tu níhín vāha nde ri modo cahān rī, te jécūhun vāha ni rī. Chi jíin ndíhi jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jícán rī xūhun núu rō siquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnúhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cacandíje ni quihin ri xūhun jéē ní

cajēhe i nuū rī, návāha súcuan-ni nacani ri jnūhun ya nuū rō jijnáhan ró. ⁹ Te ná ni condee rī jíin ró te ni ndihī xūhun rí, te tu ní jícán cuiṭi rī nuū ní iin ró. Chi hermano jeē ní quijicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiṭi rī. ¹⁰ Te nájnūhun cúcáhnu vāha ni rī jeē jiní rī jnūhun ndaā Cristo, suni súcuan jíin rī jeē ma quíhin ri xūhún nuū ni iin ñayuu ni ndáñuū Acaya, návāha ma cásī i jeē cúsi ni rī jeē súcuan-ni nácani ri jnūhun ya. ¹¹ ¿Te á síquī jeē tú manī rī jíin ró cúu jeē cahán rī súcuan, jéni ni rō, chí naún? Tuú chí máá Yaā Dios jiní yā jeē maní rī jíin ró jijnáhan ró.

¹² Te sáha ri ná-ni sáha ri, chi ma quíhin ri xūhun ró, návāha casi rī nuū jeē casátéyí tée un máá de jeē cácahān de jeē inuú cásáha de jniñu ya jíin rí. ¹³ Te tēe ún chi nasūu apóstol ndaā cácuu de, chi máni máá jnúhun stáhú cácahān de, te cásáha de máá de jeē cácuu de apóstol Cristo. ¹⁴ Te tu náā ni yō jíto yó jéē casáha de súcuan, chi je jíin yō jeē suni Satanás násama máá te stáhú jéē sáha máá nájnūhun iin ndajéhé Yaā Dios jeē jíca jíin luz yā. ¹⁵ Te jeē yúcuan suni tu náā ni yō jíto yó jéē tée cájejniñu nuū Satanás, cásáha de máá de jeē tēe ndaā cácuu de. Te iin quivī te nanihīn de síquī jniñu néé cásáha de.

Jnūndóho ni ndoho Pablo síquī jeē cúu de apóstol

¹⁶ Inga jínu cáhán rī jíin ró jeē ni iin ró ma cáni ni rō jeē tēe cánéé cúu ri. Te núu súcuan cájeni ni rō, te va cuatáhú nde ró jéē cahán rī nájnūhun tēe cánéé, návāha suni cuu cutéyí nde ri jecu nájnūhun cásáha tēe ún. ¹⁷ Jeē cahán rī vijna chi nasūu jéē ní ndacu máá Jítoho yō cúu, chi sa nájnūhun tēe cánéé cáhán rī jeē cutéyí nde ri. ¹⁸ Chi cuehē de casátéyí de máá de modo jeē iyó ini ñayiví, te suni súcuan na sátéyí nde ri maá rí núu súcuan. ¹⁹ Te va tēe cáhiyo cájí xínī cácuu nde ró, te jeē yúcuan cúu vāha

ni nde ró cuatáhú ró ñn tēe cánéé núu súcuan. ²⁰ Chi va vāha-ni cájendeyí ni rō nuū tēe un jēe casáfuera de rōhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí casájéhu de máa de nuū rō, chí ndé cácatu de nuū rō. ²¹ Te vēsú cúcanu nde ri cahān rī, te na cáhān rī jeē tu ní cūndeyí ni nde ri satéyí rí maá rí nájñuhun casáha tēe ún.

Te vijna te núu íyó sava tēe chūndeyí ni de sátéyí de máa de, te va suni chundeyí ni nde máa rí núu súcuan. Te va cáhān rī nájñuhun cáhān ñn tēe cánéé. ²² Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cájejniñu nuū jnúhun Cristo cácuu de, te víhyá gā ruhū. Te va cáhān rī nájñuhun tēe cánéé jēe cutéyí rí súcuan. Chi ni caa ga ni sájniñu ri vēsú maá de jínáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. ²⁴ Te jnáhan ri hebreo, uhūn jínu ni cacani xeēn de ruhū jín cuarta ññi, ñn cūhva jeē jé yajni cuu rī sáha. ²⁵ Unī jínu ni cacani de ruhū jín yujnu xí, te ñn jínu ni cajēhe de yuū xinī rī. Unī jínu ni quēe barco jeē ní jica ri siquī jnúhun ya. Te ñn jecuáa jín ñn ndiáca ni yosō candá rí nuū cunú ndute mar. ²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñācuñhá. Ni cācu ri nuū ñáyuu nación rī jín núu ñáyuu ñuu jícá. Ni cācu ri cháha chúcuan ná ni ñyo ri ñuu jín rancho jín mar. Ni cācu ri nuū táca jnáhan ri jeē tu íyó ndāa. ²⁷ Ni sájniñu ñihin ri te yí ní ndoho ri. Cuehē jínu ni jehni rī maá rí māñhá. Ni ji rī sōco, ni jichī rī ndute. Cuehē jínu ni ñyo ndite ni rī, ni cuijnu rī, ni cumanī sahma ri

²⁸ Te siquī tāca jēe yáha chi íyó gá. Chi ndiquivī ndóho ri jeē nācani ndasí ni rī jehē tāca grupo ñayuu cácadíje.

²⁹ Núu ñin ñayuu tu fuerza ini i, te suni ndóho ri jehē i. Te núu ñin ñayuu quívi i cuēchi sáha jnáhan i, te ndóho ri jnūhun cúcanu jíin jnúhun náxeēn ni. ³⁰ Núu súcuan te núu cánuú cutéyí nde ri, te va cutéyí rí siquī tāca jēē steén jeē tú na fuerza ini rī. ³¹ Te Yaā Dios, Yaā cúu Tátá maá Jítóho yō Jesucristo, jíiní yā jeē cahán ndaā rī. Te nńí cáni na cáhán ñayuu jeē vāha ndasí Yaā cúu ya. ³² Ná ni iyo ri ñuu Damasco, te gobernador jeē ndácu jniñu ndañúu jeē jnńí rey Aretas, ni jeni de soldado ni cacondito tāca yéhyí jeē ní condúu ndihyú ñuu ún, chi jniñ de ruhū quihñ rī vecāa ni cuni de núu. ³³ Te ni quívi ri chíjī ñin jīca, te ñayuu cácanđije ni cascúun i ruhū ventana ñin vehe jeē néne jicā jeē ndihyú ñuu ún. Te súcuan ni cācu ri nuū téē ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī. ² Jíiní rī ñin tēē cándłje Cristo, te je ni cuu uxī cuñ cuiyā jeē ní sáha ya jeē ní caa tēē un ní jehēn de nde andívi únī. Te tu jíiní rī núu ni jehēn rī jíin yiquí cúñu rī, chí ní jehēn anuá-ni rī. Máá Yaā Dios cúu jeē jíiní. ³ Te jíiní rī jeē ní ndonehen ya ruhū. Te á ní jehēn rī jíin yiquí cúñu rī, chí ní ndōo, tu jíiní rī, chi máá-ni Yaā Dios cúu jeē jíiní. ⁴ Chi ni sáha ya jeē ní caa ri ni jehēn rī nde jardín andívi. Te yūcuan ní jini sōho ri tāca jnúhun sáhí ndasí jēē ma cúu castūhun yóhó ñayuu. ⁵ Te siquī jeē ni sáha ya súcuan jíin rí cúu jeē cutéyí rí, te ma cutéyí rí siquī ndese cúu máá rí. Chi cutéyí rí máni jeē tú na fuerza ini rī. ⁶ Te núu cúní rī cutéyí rí siquī maá rí nuú, te nasūu jēē canéé rí núu sáha ri súcuan núu, chi ndaā cúu jeē iyó jeē cutéyí rí. Te ni ma sáha ri, chi tu cúní rī jeē cani ni

ñayuu jeē cujéhnū ga rī vēsú jeē ní jito i chí jéē ní jini i jnūhun ri.

⁷ Te tu cúní yā jeē yáha ri cutéyí rí siquī jeē ni stéén ndijin yā jniñu jéhnū ndasí un núū rī, te jeē yúcuan ni quiiji ñn jnūndóho jeē ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí. ⁸ Te unī jínu ni cahān ndahú rí jíin máá Jítóho yō jeē na téjiyo ya quihīn. ⁹ Te ni cahān yā jíin rí: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chi súcuan te nducuehē gā fuerza Cristo ini rī. ¹⁰ Jeē yúcuan cúu jeē cúsiñ ni rī jeē tú na fuerza rī, jíin jéē cácahān ndevāha ñayuu jíin rí, jíin jéē cúmanī nuū rī, jíin jéē cájito xeēn i ruhū, jíin jéē ndóho ri jnūndóho siquī Cristo. Chi jeē tú na fuerza maá rí, yúcuan sáha jeē nihín rī fuerza maá yá.

Jeē nácani ni Pablo siquī ñayuu cácañdije ñuu Corinto

¹¹ Te va tēe cánéé cúu ri jeē ni sátéyí nde ri maá rí. Te siquī jeē tu cácañdije ró rúhū, jeē yúcuan ní sátéyí rí maá rí. Chi cánuú jéē máá ró cuajnúhún ró ruhū nuú. Chi vēsú tú jniñu ri jeē maá rí, te va tu núu cuítī nde ri nuū tāca tēe un jéē cácahān rō jeē apóstol cujéhnū cácuu de. ¹² Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jéhnū jeē steén poder Yaā Dios, jíin tāca jniñu jeē nahán ní canaa ni rō ni cajito ró. ¹³ Te tu ní sáha ri jeē núu ga cácuu ró núū tāca gá grupo ñayuu cácañdije, chi máá ñn-ni jeē tu ní stáhān rī rohó jéē cuáha ro jéē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

¹⁴ Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chi nasūú ndajniñu ró cúu

jeē cuní rī, chi sa suhva jeē quendōo vāha ró jíin jnúhun ya. Chi nájnūhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quéndōo vāha sēhe de. ¹⁵ Jeē yúcuan cúsī ni rī st̄hi ri jeē névāha ri, te nde st̄hi ri fuerza maá rí, návāha sáha ri jeē quéndōo vāha ánuá rō jijnáhan ró. Te manī gā coo ri jíin ró, vēsú sanaa te jecu-ni cáhiyo manī rō jíin rí.

¹⁶ Te íyó jecu rō cácahān jeē vēsú tú na vé ni jícan rī nuū rō, te tēe stáhú cúu ri, chi ni nducú rí modo ndichí nihīn rī xūhun ró, cácahān rō. ¹⁷ ¿A táca tēe ní tají rí nuū rō, á ĩn máá de ni stahú de rōhó jēe nihín de xūhun ró cuu máá rí, chí naún? Tú cuīti. ¹⁸ Ni cahān ndahú rí jíin Tito jeē jécondēhé de rōhó, te ni tají rí ĩn hermano ni jeē jíin de. ¿Te chí ní stahú Tito rohó ní quihin de xūhun núū rō jeē cuu máá de, chí naún? Tuú chi ĩnuú-ni casáha ndĩndúú rí, te ĩn-ni ánuá ndĩndúú rí.

¹⁹ ¿Sanaa te cájeni ni rō jeē cahán rī jnúhun yáha návāha quendōo vāha ri jíin ró, chí naún? Nasūu súcuan cúu, chi Yaā Dios jiní yā jeē cahán rī maá-ni jnúhun jeē cuní Cristo. Te ndīhi jeē cahán rī chi nducú rí jeē ije ró jíin jnúhun ya, ñáni manī. ²⁰ Chi yúhú rí jeē núu na jéé rī, te sanaa te cuni rī jeē tu casáha ró jniñu nújnahan ni rī. Te máá ró jijnáhan ró, suni ma nújnahan ni rō ruhū. Chi sanaa te cátejñáhan ró, cácuquésún ni rō, cáquit̄ ni rō, casándúxí ró, casájnúhún ró, cácahān rō siquī jnáhan ró, cácutéyí ró, cájica néé ró. ²¹ Te yúhú rí jeē núu na jéé tucu ri te cuāha Yaā Dios jnúhun canu nuū rī jeē súcuan casáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jniñu jnéhén jniñu jíca jnéni jíin jniñu néé ndasí ní casáha ró.

Saludo jíin jnúhun cástūhun Pablo jeē sánd̄hí

13

¹ Yāha cúu vuelta unī jeē jécondēhe rí rohó. Te sándaā yō jniñu nájnūhun cáhán tutu: Jíin jnúhun jeē cahán uū chí únī testigo te cundaā tācá jniñu, áchí. ² Te vijna jeē íne jíca rí te cáhán tucu ri nájnūhun ni cahān rī ná ni ine ri jíin ró. Cáhán rī nuū ñáyuu ni casáha cuēchi un jíin núu ndihí ró, jeē núu na jéé tucu ri te ma cóo vītá ni rī jíin ró. ³ Te yūcuán cuu prueba jeē cánducú ró, suu núu jendaá jeē cahán rī jíin fuerza Cristo. Chi Cristo tu cúmanī fuerza yā jeē sándaā yā jíin ró, chi stéén yā poder yā mēñu ró. ⁴ Te vēsú tu ní stéén yā fuerza yā ná ni jihī yā jicā cruz, te vijna chi técu yā jíin poder Yaā Dios. Te nájnūhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu rī jíin yá jeē cuajníñu ri nuū rō jeē siquí jnúhun ya.

⁵ Coto ndee rō maá ró núu cáhīin nihin ró jíin jnúhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró? ⁶ Te ñúhun ni rī jeē suni cá cucáhnu ni rō jeē maá rí cácandíje ndije ri. ⁷ Te cájicān tahu rī nuū Yaā Dios jeē ma sáha ró ni ñin jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chi máni jeē na sáha ró jniñu ndaā cúu jeē cánducú rí. ⁸ Chi tu jési ri nuū jníñu ndaā, chi sa suhva scáca ri. ⁹ Núu súcuan te cá cusī ni rī núu tú na fuerza maá rí, te núu íyó fuerza maá ró. Te níni cá cān tahu rī jeē na íje ga ni rō jijnáhan ró jíin jnúhun ya. ¹⁰ Te téé ri carta yáha nuū rō nde ná tu jeē rī, návāha núu na jéé rī te tuá jíni ñúhún cuxeēn rī nuū rō. Chi ni jēhe Jitoho yō jniñu ndíso ri yáha jéé sáha ri jeē íje ánuá rō jíin jnúhun ya, nasūu jéé snáā rī.

¹¹ Je ni cahān yō núu súcuan hermano, te na cóo jeē váha jíin ró jijnáhan ró. Te na cóndihvī ni rō ije ró jíin

jnúhun ya, te coo ndeyí ni rō. Te na cóo inuú ni rō te coyūcu mánī rō jín jnáhan ró. Te Yaā ndíso jnūhun ndeyí sñ ni jín jnúhun cundáhu ni, coo ya jín ró jijnáhan ró. ¹² Te jeē cahán rō jín táca jnáhan ró, te yñúhún techūhu ró ndaha i. ¹³ Sándeyí ni rō jijnáhan ró, áchí hermano cácanđje jeē cáyūcu yáha.

¹⁴ Te ñúhun ni rī jeē Jítóho yō Jesucristo na sáha ga yā jeē váha róhó jijnáhan ró, te Yaā Dios cundáhu ni yā rohó, te Espíritu Santo condee cáhnu ya jín ró. Súcuan na cóo. Amén.

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 13 Jun 2022

9665e546-39d0-5bd5-8b10-38916a94951f